

МОНГОЛ УЛСЫН ХУУЛЬ

2018 оны ... дугаар
сарын ...-ны өдөр

Улаанбаатар
хот

ДАЙЧИЛГААНЫ ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

1 дүгээр зүйл. Дайчилгааны тухай хуульд доор дурдсан агуулгатай дараах хэсэг, заалт нэмсүгэй:

1/ 3 дугаар зүйлийн 3.1.14, 3.1.15 дахь заалт:

“3.1.14.”дайчилгаа” гэж улс орны эдийн засаг, нийгмийг шаардлагатай үед дайны байдалд шилжүүлэх, зэвсэгт хүчнийг өргөтгөн зохион байгуулахын тулд дайчилгааны бэлтгэл нөөцийн бүрэлдэхүүн, улсын болон санхүүгийн нөөцийг дахин хуваарилах зорилгоор төрөөс хэрэгжүүлж байгаа цогц арга хэмжээг;

“3.1.15.”дайчилгааны бэлтгэл” гэж улс орны эдийн засаг, нийгмийг дайны байдалд шилжүүлэх бэлтгэл, зэвсэгт хүчнийг өргөтгөн зохион байгуулах бэлэн байдлыг хангах арга хэмжээг тайван цагт хэрэгжүүлэхийг.”

2/13 дугаар зүйлийн 13.1.9 дэх заалт:

“13.1.9.энэ хуулийн 4.4-т заасан улсын дайчилгааны бэлтгэлийг хангах үндсэн арга хэмжээг зохион байгуулах.”

3/16 дугаар зүйлийн 16.1.8 дахь заалт:

“16.1.8.энэ хуулийн 4.4-т заасан улсын дайчилгааны бэлтгэлийг хангах үндсэн арга хэмжээг эрхлэх асуудлынхаа хүрээнд хэрэгжүүлэх.”

4/16 дугаар зүйлийн 16.2.4 дэх заалт:

“16.2.4.энэ хуулийн 4.5-д заасан улсын дайчилгаа явуулах үндсэн арга хэмжээг эрхлэх асуудлынхаа хүрээнд хэрэгжүүлэх.”

5/ 18 дугаар зүйлийн 18.1.9 дэх заалт:

“18.1.9.нутаг дэвсгэрийнхээ байгууллага, аж ахуйн нэгж, иргэний дайчилгааны даалгаврын биелэлтэд хяналт тавих.”

6/ 20 дугаар зүйлийн 20.1.4 дэх заалт:

“20.1.4.дайчилгааны даалгаврыг үндэслэн дайчилгааны төлөвлөгөө боловсруулах.”

7/ 28 дугаар зүйлийн 28.4 дэх хэсэг:

“28.4. Цэргэг-стратегийн бэлтгэл сургалтын зардлыг улсын төсвөөс, энэ хуулийн 28.3-т зааснаас бусад цэргийн бэлтгэл сургалтын зардлыг орон нутгийн төсөвт тусган санхүүжүүлнэ.”

8/ 29 дүгээр зүйлийн 29.3 дахь хэсэг:

“29.3. Дайчилгааны бэлтгэл нөөцийн бүрэлдэхүүний сургалтыг Цэргийн албаны тухай хуулийн 33 дугаар зүйлд заасны дагуу зохион байгуулна.”

2 дугаар зүйл. Дайчилгааны тухай хуулийн 2 дугаар зүйлийн 2.1 дэх хэсгийн “Үндсэн хууль,” гэсний дараа “Монгол Улсын батлан хамгаалах тухай хууль, Зэвсэгт хүчний тухай хууль” гэж, 28 дугаар зүйлийн 28.1.2 дахь хэсгийн “Засаг дарга” гэсний дараа “, Тамгын газрын дарга” гэж тус тус нэмсүгэй.

3 дугаар зүйл. Дайчилгааны тухай хуулийн дараах зүйл, хэсэг, заалтыг доор дурдсанаар өөрчлөн найруулсугай:

1/ 1 дүгээр зүйл:

“1 дүгээр зүйл. Хуулийн зорилт

“1.1. Энэ хуулийн зорилт нь Монгол Улсын эдийн засаг, нийгмийг дайны байдалд шилжүүлэх бэлтгэл, зэвсэгт хүчнийг өргөтгөн зохион байгуулах бэлэн байдлыг хангах, дайчилгаа явуулах үндэслэл, журам, энэ талаарх төрийн байгууллагын бүрэн эрх, засаг захиргаа, нутаг дэвсгэрийн нэгжийн удирдлага, иргэн, хуулийн этгээдийн хүлээх үүргийг тогтоож, дайчилгаа явуулахтай холбогдсон харилцааг зохицуулахад оршино.”

2/ 3 дугаар зүйлийн 3.1.4, 3.1.5, 3.1.6 дахь заалт:

“3.1.4. “дайчилгаатай сургууль” гэж оногдуулан бүртгэгдсэн цэргийн бэлтгэл үүрэгтэн, техник хэрэгслийг цэргийн хээрийн сургуульд татан оролцуулахыг;”

“3.1.5. “дайчилгааны даалгавар” гэж улс орны эдийн засаг, нийгмийг дайны байдалд шилжүүлэх, зэвсэгт хүчнийг өргөтгөн зохион байгуулах зорилгоор энэ хуулийн 8 дугаар зүйлийн 8.2, 8.3 дахь хэсэгт заасан эрх бүхий байгууллага, албан тушаалтнаас төрийн захиргааны төв байгууллага, засаг захиргаа, нутаг дэвсгэрийн нэгж, иргэн, хуулийн этгээдэд хүлээлгэсэн үүргийг;”

“3.1.6. “цэргийн дайчилгааны нөөц” гэж зэвсэгт хүчнийг өргөтгөн зохион байгуулахын тулд дайчлан татахаар төлөвлөсөн төрийн байгууллага, иргэн, хуулийн этгээдийн өмчлөлд байгаа зэвсэглэл, техник, эд хөрөнгийг;”

3/ 3 дугаар зүйлийн 3.1.13 дахь заалт:

“3.1.13. “дайчилгааны төлөвлөгөө” гэж улс орны эдийн засаг, нийгмийг дайны байдалд шилжүүлэх бэлтгэл, зэвсэгт хүчнийг өргөтгөн зохион байгуулах бэлэн байдлыг хангахын тулд хэрэгжүүлэх арга хэмжээг цаг хугацаа, байр, үүрэг, хариуцах эзэн, арга хэлбэр, багтаамжаар нь уялдуулан зохицуулж боловсруулсан баримт бичгийн цогцыг;”

4/ 4 дүгээр зүйл:

“4 дүгээр зүйл. Дайчилгаа

4.1.Улс орны эдийн засаг, нийгмийг дайны байдалд шилжүүлэхийн тулд улсын болон санхүүгийн нөөцийг дахин хуваарилах замаар улсын дайчилгааг явуулна.

4.2.Дайчилгаа нь бүх нийтийн болон хэсэгчилсэн байна.

4.3.Зэвсэгт хүчнийг өргөтгөн зохион байгуулах зорилгоор цэргийн дайчилгаа явуулах бөгөөд энэ нь улсын дайчилгааны бүрэлдэхүүн хэсэг байна.

4.4.Улсын дайчилгааны бэлтгэлийг хангах үндсэн арга хэмжээ:

4.4.1.эрх зүйн хувьд зохицуулах;

4.4.2.төрийн захиргааны төв болон нутгийн захиргааны байгууллагын дайчилгаа явуулах нөхцөлийг тодорхойлж, бэлтгэлийг хангах;

4.4.3.улс орны эдийн засаг, нийгмийг дайны байдалд шилжүүлэх бэлтгэлийг хангах;

4.4.4.төрийн захиргааны төв байгууллага, засаг захиргаа, нутаг дэвсгэрийн нэгж, хуулийн этгээдийн дайчилгааны даалгаврыг тогтоох, дайчилгааны төлөвлөгөө боловсруулах;

4.4.5.улсын дайчилгааны даалгавартай нөөцийг бүрдүүлэх;

4.4.6.дайчилгааны сургалт, дайчилгаатай сургууль зохион байгуулж явуулах;

4.4.7.баталгаат албан тушаалын жагсаалт гаргах;

4.4.8.зэвсэгт хүчнийг байлдааны цагийн орон тоонд шилжүүлэх бэлтгэлийг хангах;

4.4.9.дайчилгааны бэлтгэлийг үнэлж, дүгнэх.

4.5.Улсын дайчилгаа явуулах үндсэн арга хэмжээ:

4.5.1.дайчилгаа явуулах шийдвэр гаргах;

4.5.2.дайчилгааны зарлан мэдээллийг явуулах;

4.5.3.зэвсэгт хүчнийг байлдааны цагийн орон тоогоор өргөтгөн зохион байгуулах;

4.5.4.төрийн захиргааны төв байгууллага, засаг захиргаа, нутаг дэвсгэрийн нэгжийн удирдлагыг дайчилгаа зохион байгуулах горимд шилжүүлэх;

4.5.5.улсын санхүүгийн нөөцийг дахин хуваарилах;

4.5.6.зэвсэгт хүчний бүрэлдэхүүнд шилжүүлэх, түүний ажиллагааг

дэмжих дайчилгааны даалгавартай нэгжийг байгуулах;

4.5.7.тээврийн байгууллагын үйл ажиллагааг дайчилгааны горимд шилжүүлэх;

4.5.8.олон нийтийн хэвлэл, мэдээллийн үйл ажиллагааг зохицуулах;

4.5.9.хүн амыг хүнсний болон бусад наад захын хэрэгцээт бүтээгдэхүүнээр нормчлон хангахад бэлтгэх;

4.5.10.дайчилгааны даалгаврын дагуу хэрэгцээт бүтээгдэхүүн үйлдвэрлэж байгаа үйлдвэр, аж ахуйн нэгжийг шаардлагатай нөхцөлд нүүлгэн шилжүүлэх.”

5/ 8 дугаар зүйлийн 8.2 дахь хэсэг:

“8.2.Төрийн захиргааны төв байгууллага, аймаг, нийслэлийн дайчилгааны даалгаврыг Засгийн газар; сум, дүүрэг, хуулийн этгээдийн дайчилгааны даалгаврыг аймаг, нийслэлийн Засаг дарга; иргэн, хуулийн этгээдийн дайчилгааны даалгаврыг сум, дүүргийн Засаг дарга тус тус тогтооно.”

6/ 19 дүгээр зүйлийн 19.1.3 дахь заалт:

“19.1.3.иргэн, хуулийн этгээдийн дайчилгааны даалгаврын биелэлтэд хяналт тавих;”

7/ 21 дүгээр зүйлийн 21.1.2 дахь заалт:

“21.1.2.хуульд заасны дагуу дайчилгааны сургалт, дайчилгаатай сургуульд оролцох;”

8/ 27 дугаар зүйл:

“27 дугаар зүйл. Галт зэвсгийг дайчлах

“27.1.Хувийн өмчид байгаа бүх төрлийн зэвсэг, галт хэрэглэлийг цэргийн дайчилгааны даалгаврын дагуу аймаг, нийслэлийн төрийн захиргааны байгууллага дайчилна.”

9/ 31 дүгээр зүйлийн 31.2, 31.3 дахь хэсэг:

“31.2.Дайчилгаатай сургуульд оролцох иргэнд аймаг, нийслэлийн Засаг дарга сургууль эхлэхээс 1 сарын өмнө зарлан дуудах мэдэгдэл гардуулна.

31.3.Дайчилгааны бэлэн байдлыг шалгах зорилгоор цэргийн нэгтгэл, ангийн байлдааны цагийн орон тоонд оногдуулан бүртгэгдсэн цэргийн бэлтгэл үүрэгтнийг зарлан дуудах мэдэгдэл урьдчилан гардуулахгүйгээр дайчилгааны дохиогоор цуглуулан сургуульд оролцуулж болно.”

10/ 31 дүгээр зүйлийн 31.5, 31.6 дахь хэсэг:

“31.5.Дайчилгаатай сургуульд оролцогчийг байлдагч, түрүүчийн хүнс, хувцасны хээрийн нормоор хангаж, эмнэлгийн үйлчилгээ үзүүлнэ.

31.6. Аймаг, нийслэл, дүүргийн Засаг даргын Тамгын газрын Цэргийн штаб цэргийн бэлтгэл үүрэгтний дайчилгааны сургалт, сургуульд оролцсон тухай цэргийн үүрэгтний үнэмлэхэд тэмдэглэл хийнэ.”

4 дүгээр зүйл. Дайчилгааны тухай хуулийн 8 дугаар зүйлийн 8.1 дэх хэсгийн “аж ахуйн нэгж, байгууллага, иргэд” гэснийг “иргэн, хуулийн этгээд” гэж, 23 дугаар зүйлийн 23.3 дахь хэсгийн “дайчлах хуудсанд” гэснийг “зарлан дуудах мэдэгдэлд” гэж, 34 дүгээр зүйлийн 34.2 дахь хэсгийн “нууцын зэргийг” гэснийг “нууцлалыг” гэж тус тус өөрчилсүгэй.

5 дугаар зүйл. Дайчилгааны тухай хуулийн 6 дугаар зүйлийн 6.4 дэх хэсгийн “Хэрэв Улсын Их Хурал дайчилгаа зарлах шаардлагагүй гэж үзвэл Ерөнхийлөгчийн зарлиг хүчингүй болно.” гэснийг, 26 дугаар зүйлийн 26.3 дахь хэсгийн “улсын захиалга-даалгавраар”, 34 дүгээр зүйлийн 34.1, 34.3 дахь хэсгийн “Цэргийн” гэснийг тус тус хассугай.

6 дугаар зүйл. Дайчилгааны тухай хуулийн 3 дугаар зүйлийн 3.1.8, 3.1.12 дахь заалт, 6 дугаар зүйлийн 6.2, 6.3 дахь хэсэг, 13 дугаар зүйлийн 13.1.6 дахь заалт, 20 дугаар зүйлийн 20.1.3 дахь заалт, 24 дүгээр зүйлийн 24.6 дахь хэсэг, 26 дугаар зүйлийн 26.4 дэх хэсэг, 29 дүгээр зүйлийн 29.1, 29.2 дахь хэсэг, 31 дүгээр зүйлийн 31.4 дэх хэсгийг тус тус хүчингүй болсонд тооцсугай.

7 дугаар зүйл. Энэ хуулийг 2018 оны ... дугаар ... сарын ... -ны өдрөөс эхлэн дагаж мөрдөнө.

ГАРЫН ҮСЭГ